

AKASHVANI AIZAWL
REGIONAL NEWS UNIT
(MIDDAY)



DAMPA BY-POLL

Dampa bial By-Election chu tukin dar 7 atang khan boruak muanawm tak hnuaiah kalpui a ni a, Vote tla percentage hi vawiin chawhnu dar 1 thleng khan vote za-a 56.35 a ni.

Akashvani News Aizawl-in Reiek khuaa polling station-te a tlawh kualnaah Election duty te chuan vote thlak laia harsatna thleng a awm lo an ti a, khawl Chiang lo awmna pawh awm bawk mahse vote thlak khaihlak awm loin khawl hi a thara thlak a nih thu an sawi.

Vawiin chhun dar 1 thleng khan Reiek Polling Station-I ah vote 58.28% a tla tawh a; Polling Station-II ah 55.30% tla tawh bawkin, vote thlak tura intlar engemawzat an la awm a, election duty-te chuan tlai lama vote thlak tum an tam nia an hriat thu an sawi.

Tarlan tawh angin Dampa bial By- Election kapui mekah hian Polling Station 41 awmin Polling station 40-ah hian webcasting kalpui niin Zopui Polling station-ah erawh kawlphehtha a luh loh avangin kalpui ve theih a nilo a ni. Dampa Constituency chhungah hian Critical Polling station Silsury I,II, III te an ni a. 2-Dampa-ah hian vote awm zawng zawng hi 20790 a ni.



POL PARTY REACTION

Dampa Bial Bye-election vawiina neihah Party hrang hrangin hnehna chan ngei an in beisei thu an sawi.

Akashvani News Correspondent in party hrang hrang a zawh kualah Party hrang hrang hotute chuan Dampa bial by-election ah tlin ngei an inrin thu an sawi a, ZPM Vice President, Dampa bial by-election campaign chairman ni bawk Pu C. Lalnunnema chuan Dampa Bial mipui chevel bakah party worker te phur dan leh Party hruaitute thahnemngaihna enin ZPM candidate Pu Vanlalsailova chuan hnehna a chan ngei a rin thu a sawi a, Dampa Bial mipuite chuan sorkar mek an nihna leh kalphung thar mipui sorkar an nihna anga hma an lakna te an hmuh avangin ruling MLA neih ve duhna thinlung an nei lian hle a a hriat thu a sawi bawk a ni.

MNF Vice President Pu Lalhhandama Ralte chuan vawiina Dampa Bial by election a candidate tha tak tak karah MNF party candidate, an party senior Vice President ni bawk, Dr. R.Lalthangliana chu politics lama a tawnhriat leh hun hman

tawhte thlirin mipuite duh leh ngainat a hlawh dawna an hriat thu a sawi a, hei bakah hian sorkar lai chu sawi loh ang zela an awm avangin mipuiten an chhangkham tan tawh hle a an hriat thu sawiin, tun by-election neih mekah mipuiten warning pek nan an hmang dawn a a hriat thu a sawi a, tun inthlanah hian Pathian leh mipuite zarah MNF party chuan hnehna an chan ngei a rin thu sawiin, MNF in hlawhtlinna an chang a nih chuan kum 2028 inthlanpuia MNF sorkar leh theihna kawngah mipui thinlungah thu a sawi ngei a rin thu a sawi bawk a ni.

BJP Mizoram President Dr. K. Beichhua chuan Dampa bial by-election ah tling ngei turin theihtawp an chhuah avangin an candidate Pu Lalhmingthanga chu a tlin ngei an beisei thu a sawi a, an lo tling a nih chuan mipuite chu hmasawnna duha an tuihal avangin BJP an vote tling nia a ngaih thu a sawi a, tu party tan pawh tun By-electionah hian tling kher lo pawhin vote share a pawimawh avangin kum 2028 Assembly inthlanpuiah an hlawkpui a rin thu a sawi a ni.

Congress Treasurer Dr. Lalmalsawma Nghaka chuan Dampa Bial By election ah hian Congress Party chu hmasawn nasa ber an nih thu khawtual mite'n an sawi a ti a, chu thli chuan Congress Party Candidate, an party Vice President ni bawk Pu John Rotluangliana pawh a tlin tir ngei an rin thu sawiin, Dampa biala an campaign naah mipuite chuan Congress Party chu an thutiamah an ding nghet a, an Policy an tihlawhtlin thin avangin kum 2028 chu Congress hun a ni tawh an tih thu sawiin kum 2028 Assembly inthlanpui lo awm turah sorkarna siam thei ngei turin Congress Party chu an inbuatsaih mek tih a sawi a ni.

PC Party President Pu Vanlalruata chuan tun tum Dampa Bial By-election ah hian tlin an in ring lem lo a ti a, hetihlai hian he inthlanah an party in candidate an din tir nachhan chu hun kal zelah an party tan a that beisei vanga ti an nih thu a sawi a ni.



PTC RECRUITMENT

Akashvani (All India Radio) Aizawl Regional News Unit chuan District hrang hranga thawk tur Part Time Correspondent (PTC) a la dawn.

Akashvani Aizawl Regional News Unit chuan PTC tur hi Aizawl, Hnahthial, Vairengte, Champhai North leh Chawngte ah te a la dawn a, kum 24 atanga kum 50 inkar Graduate tan November ni 14, 2025 thleng dilna thehluh theih a ni.

PTC dilna form hi News Section, Akashvani Aizawl pisa Tuikhuahtlangah lak theih ani dawn a, AIR News Aizawl Facebook page ah download theihin a awm bawk ang.

Hrechiang duh tan AIR News Aizawl Social media page ah leh phone number 8131823773 ah zawhfiah theih a ni.



CPR TRAINING

Kolkata-a Manipal Hospital EM Bypass chuan Aizawl ah hriselna chungchanga leh CPR tihdan zirtirna hun a buatsaih

Ramchhunga natna tlangtlan tak Heart Attack avanga mi tam takin nunna an chan thin tih tlem anih theih nan leh hemi kawnga invenna turin Kolkata-a Manipal Hospital EM Bypass chuan an beihpui thlakna ‘Anveshana – Medical Education for Media’ kaltlangin Cardiopulmonary Resuscitation (CPR) tihdan chu nizan khan Hotel Regency, Aizawlah a buatsaih a, hetah hian damdawi lama mithiam tak tak te chuan chanchinbumite chu CPR tihdan zirtirin minute 18 chhunga chhanchhuah theih dan tur an tarlang a ni.

He hunah hian chanchinbumi thahnem tak telin training session hi an chhim a, training session-a tel te hian CPR Training certificate dawngin heng bakah hian Manipal Hospital EM Bypass, Kolkata-a Health Card dawngin hei hi ramchhunga Manipal damdawiin hrang hrangah a hman tangkai theih dawn a, Mizoram nena thlunzawm an duhna leh mipuite chu hriselna tha zawk pek an duhna lian tak hmangin Manipal damdawiin hian theihtawp a chhuah zel a ni.

